

# PLEIV SUMVITG

Muossavia  
per dis da mortori e sepultura  
dalla pleiv Sumvitg

Las indicaziuns davart las personas e las funcziuns en quella costituziun serefereschan ad omisduas schlatteinas, aschilunsch ch'ei resulta buc enzatgei auter ord il senn dalla costituziun.

### **Tgei sto vegnir fatg sco empren?**

- a) Sch'enzatgi miera a casa eisi da clamar il miedi per schar constatar la mort.
- b) Dar part als tierparents ed ad enconuschents, ev. tenor gliesta d'adressedas e numeras da telefon preparada.
- c) Orientar igl uffeci parochial/plevon (**tel. 081 936 41 31 ni 079 898 82 53**) ni il secretariat dalla pleiv (**tel. 081 943 13 27 ni 079 569 21 70**) e fixar il di e l'ura da sepultura.
- d) Dar si l'annunzia da mort.  
Quei san ins far per tuttas gasettas alla Somedia SA, 7130 Glion  
**tel. 081 920 07 17, fax 081 920 07 18 ni per mail: ilanz@somedia.ch**
- e) Procurar per vestgir en il defunct, procurar pil vischi e per la crusch.  
Per quei intent san ins sevolver tier ils instituts da bara, per exempel:
  - ABAS Bestattungen AG, Sefi Decurtins, Cuera (**tel. 081 286 92 11**),
  - Furger Taxi, Mustér (**tel. 081 936 44 44**).
- f) Quels instituts organiseschan era il transport dalla bara naven da casa alla caplutta da morts.
- g) **Sepultura dalla bara en vischi**  
Procurar per 4 porta-bara ed ina persuna che porta la crusch. Ei drova era 4 porta-bara cu ins vegn cul defunct ni la defuncta da casa ni d'ordeifer en caplutta da morts.  
**Sepultura d'urna**  
Procurar per ina persuna che porta l'urna ed ina persuna che porta la crusch.
- h) Tier l'empustaziun da tschupials sto vegnir indicau:
  - Inscriziun sin pindels per exempel: "Viva en Cristus", "En engrazieivladad",
  - Indicaziun exacta dils nums ed il text giavischau,
  - Adressa da furniziun: a casa ni direct en caplutta da morts.
- i) Procurar per personas che portan ils tschupials il di da sepultura.
- j) Empustar en in'ustria il past da bara, sche quei ei giavischau.
- k) Fixar in termin per in discuors cul plevon sur dil decuors dalla sepultura.

- l) Nominar ina persuna che prelegia il cuors da veta dil defunct.

### **Tuchiez**

#### **Tuchiez per annunzia dalla mort d'ina parochiana ni in parochian:**

- a) Ei vegn tuccau da miert mintgamai l'ura pleina: 08.00-11.00 e 14.00-17.00.
- b) Ei vegn tuccau da miert ella baselgia parochiala dil domicil dil defunct.
- c) Ha il defunct giu domicil a Cumpadials ni a Reits ni en in dils uclauns dalla pleiv cun caplutta, vegn era tuccau da miert leu.

#### **Tuchiez e temps per retscheiver la bara ni l'urna:**

- a) Cu la bara ni l'urna vegn purtada en caplutta da morts resp. en baselgia vegn tuccau il zenn grond per tuts.
- b) Il plevon ni la grupp da liturgia ni ina persuna incumbensada retscheiva la bara resp. l'urna e fa las funcziuns tenor il cudischet preparaus per quei intent. Il temps per retscheiver la bara resp. l'urna ei fixaus per avon miezdi sin las 10.45 e per suenter miezdi sin las 17.00. Cu igl ei messa allas 17.00 vegnan las funcziuns fatgas allas 16.30.
- c) Vegn l'urna purtada en caplutta da morts ni en baselgia ordeifer ils temps fixai san ils confamiliars decider il temps.

#### **Tuchiez tier sepulturas dad urnas:**

Tier sepulturas dad urnas che vegnan satradas mo el ravugl dalla famiglia sa, sin giavisch, vegnir tuccau sin viadi en santeri il zenn grond.

#### **Diever dalla caplutta da morts e rusari:**

- a) La caplutta da morts ei aviarta ils dis che la bara sesanfla leu dallas 09.00 entochen allas 20.30 uras. Il caluster ni ina persuna incaricada arva e siara la caplutta.
- b) Candeilas, glisch perpetna, parlet d'aua benedida ed ina scaffetta per condolenzas ein a disposiziun.
- c) Per evitar ch'ils mirs dalla caplutta da morts e dalla baselgia vegnien ners, astga vegnir fatg diever mo dallas candeilas che la pleiv metta a disposiziun. Candeilas che vegnan pridadas da casa astgan buca vegnir envidadas.

- d) Il vischi ha per ordinari ina finiastra che sa vegnir aviarta. Per prender risguard sin las personas che vulan far ina viseta al defunct en caplutta da morts astga il vischi buca vegnir scuvretgs dil tut.
- e) Il rusari per il defunct vegn recitau ella baselgia parochiala dil domicil dil defunct per regla la davosa sera (allas 19.00) avon il survetsch divin funeral. La famiglia dil defunct sa giavischar, schebein ei duei vegnir recitau dus rusaris. Quei era sche la bara ni l'urna ei buca en caplutta da morts.
- f) Quels dis ch'igl ei messa ni devoziun da penetienza en baselgia parochiala la sera, vegn il rusari recitau mintgamai suenter la messa ni la devoziun. Ein ulteriuras devoziuns fixadas, crodan quellas en favur dil rusari dil defunct.

### **Sepultura**

- a) Il di da sepultura retscheiva il plevon la bara resp. l'urna en ni avon caplutta da morts.
- b) Sch'il vischi ni l'urna arrivan pér il di dalla sepultura en baselgia, san els vegnir tschentai directamein entadem baselgia.
- c) Il vischi ni l'urna vegnan sfundrai en fossa durant las funcziuns funeralas. Delegaziuns cun bandieras d'uniuns ni organisaziuns dil defunct, prendan cumiau cul davos salid sur la fossa.
- d) Vegn la bara cremada pér suenter la messa funerala, vegn il vischi purtaus dils porta-bara e cun la crusch, accumpignaus dil plevon e dils ministrants e sin giavisch era dils pli tierparents alla fin dalla messa ord baselgia. Delegaziuns cun bandieras d'uniuns ni organisaziuns dil defunct prendan cumiau cul davos salid avon che la bara vegn purtada ord baselgia. Il pievel spetga en baselgia tochen ch'il plevon tuorna anavos e dat la benedicziun finala. Ils pli tierparents che han accumpignau la bara tuornan era anavos en baselgia.
- e) Urnas vegnan satradas ella part dil santeri previus per urnas ni sin giavisch ella fossa comunabla a Sumvitg. Sin giavisch dil defunct ni dalla parentella sa vegnir lubiu da satrar in'urna ni pliras urnas en ina fossa existentia (incl. en fossas dad urnas). Il ruaus da fossa sedrezza tenor las directives dalla vischnaunca.
- f) Mortoris tochen 1 onn vegls valan sco barets. Quels vegnan satrai el santeri sche pusseivel el liug dallas urnas.
- g) Il ruaus da fossa munta a minimum 20 onns, excepìu per urnas che vegnan satradas en fossas gia occupadas. Pil mortuari sin santeri a Surrein vala il temps da ruaus tenor la "disposiziun executiva per satrar e deponer urnas el mortuari vegl e niev en santeri a Surrein".

### **Cuosts**

- a) Per cuvierer ils cuosts da sepultura, diever dalla caplutta da morts incl. schubergiar, candelas etc. tschenta la pleiv quen per ina taxa da diever da frs. 100.

- b) Per personas d'otra ni negina religiun valan las taxas tenor reglament.
- c) Ina messa fundada cuosta frs. 500 e vegn legida duront 25 onns. L'annunzia persunter ei d'inoltrar al secretariat dalla pleiv.
- d) L'unfrenda che vegn prida si il di da sepultura va miez per la baselgia e miez per messas per las olmas.
- e) Ils cuosts per cavar fossa e satrar per indigens vegnan surpri dalla vischnaunca da Sumvitg. Per personas d'ordeifer vegnan quels cuosts adossai directamein alla famiglia dil defunct.
- f) La taxa per la fossa comunabla d'urnas a Sumvitg vegn incassada entras la vischnaunca. Quella munta per indigens frs. 1'800, per defuncts cun domicil ordeifer la vischnaunca frs. 2'100. En quella taxa ei cumpriu la tabla cun inscripziun che vegn procurada dalla vischnaunca. Resalvadas ein midadas entras la vischnaunca Sumvitg.
- g) La taxa pil mortuari vegl e pil niev a Surrein vegn incassada dalla vischnaunca. Per igl emprendem plaz ella nischa vegn incassau per defuncts indigens frs. 2'200, per defuncts cun domicil ordeifer la vischnaunca frs. 2'500. Ina secunda urna ella medema nischa cuosta per defuncts cun davos domicil en vischnaunca frs 1'000, per defuncts cun domicil ordeifer la vischnaunca frs. 1'500. En quella taxa ei cumpriu la tabla cun inscripziun che vegn procurada dalla vischnaunca. Resalvadas ein midadas entras la vischnaunca Sumvitg.
- h) La taxa per in plaz en ina fossa d'urnas a Rabius munta frs. 400. Resalvadas ein midadas entras la vischnaunca Sumvitg.

### **Entrada en vigur**

Quest muossavia va en vigur cun igl 1. da schaner 2017.

Revedius ed approbaus dalla suprastanza da pleiv dils 28 da settember 2017.

### **Per la pleiv Sumvitg**

Il president  
Walter Deplazes

Igl actuar  
Armin Candinas